

Lehmder Vertellsel Nr. 4 von August Kruse

In Haoverbäke bin Danz uppe Daol

Ja nich , - dunn wör dor maol in 'n Winterdag bin Wirt Lange son gemütlichen Aobend mit Danz uppe Daol. Use Papp'n segg tau us Junges, dor könnt gi uck ja woll es hengaon, dat is ja inne Naoberskupp. Ja nich , - wi löten us da nich tweimaol seggen; wi güngen los. Dat wör dor uck eiste ganz gemütlich, ja dor wütt masse Schluck un Beier drunken. Wenn dei Lüe in Haoverbäke aowern dorn bäten tauväl van kriegt, dann sind dei all drocke licht empfindlich. So güng dat dann uck min Brauer Heinrich wat an. Hei kreg dor Krach mit ein 'n Haoverbäker, un dat güng dunn sofort in Saoken. Ja nich , - dei Haoverbäker wütt so dull, hei klink-

te von Kaustall gave ein Fösket los, haulde daormit aover und wull min Brauer Heinrich einen daormit langen. Ja nich , - min Brauer Heinrich har aowern Glück, denn am Fösket wör unnerm Kalv anbunnen. Ja nich , - dat mildere den Schlach gewaltig. Aower dat arme Kalv flög mitsamt dat Fösket ännne Sit uppe Hiln. Ja nich , - ick miskede dor uck ja dunn kräftig mit, ick har noch drocke Latt'n van Tun trän, un dunn harn wit all wunnen. Aowern wi hebbt dann doch drocke maakt, dat wi wegköm'm. An Wichter hebbt wi dunn nich mehr dacht, wat änlick dei Ursaoke wör van denn ganzen Spektaokel.

Havikhorst un dei Schaopbuck

Ja nich , - eines Daogs wüt ick van usen Lehrer Havikhorst bestraofft. Ick kreg links und rechts wecke achte dei Ohrn; un dat nao mine Meenung tau unrecht. At dei Schaul ute wör, löp ick sofort nao Hus, wat änners gaor nich min Maude wör. Dei Havikhorst möss nämlich, wenn hei nao Hus henwoll, achter usen Hoff vörbi.

Ja nich , - wi harn tau dei Tied ein ganz'n dulln Schaopbuck upp'n Haofe. Ja nich , - ick leggte mi dormit achterd Äuwer un teufde, bitt dei Lehrer kömp. At dei Havickhorst dann so pomadich mit dei Han'n upp'n Rügge ankömp, löt ick denn dulln Schaopbuck los. Ja nich , - dei Schaopbuck seech sofort sien Opfer und stöd'de den aohlen Mann daor daol dat hei

uppe Näsen leg. Ja nich , - ick leg achtern Äuwer un bekeek mi dat. Dei Havikhorst rappelte sick werrer inne Höchde. At hei nu wer liek stünd, kreg hei wer'n Bums, dunn leg hei daor weer. Ja nich , - ick wüß dat ja woll. Ick har den Havikhorst ja uck woll seggen konnt, hei schull daorn Aogenblick liggen bliewen, dann geht dei Buck van sülves wech. Ja nich , - aower hei weiss ja woll, dei Havikhorst har sick mi gegenöwer ja uck nich önlick benaomen. Hat hei dunn mann liggen blew, dunn durde dat uck blos noch'n Aogenblick, un dei Buck kömp van sülves nao mi her, hei dachte sicher, dei Lehrer heff sin Deil nu uck woll all krägen.